

Museum d'art – lieu per inscunters d'art plain vita

Il Museum d'art dal Grischun preschenta ses program da giubileum

DA MARTIN CABALZAR

■ **Il Museum d'art dal Grischun festivescha quest onn ses giubileum da tschient onns cun in ciclus da set exposiuns che vegnan accompagnadas dad in vast program.** Ier han ils co-directurs *Stephan Kunz* e *Nicole Seeberger* preschentà il concept d'exposiziun. La Quotidiana è stada preschenta e dat ina survista da las set exposiziuns previdas en il decurs da l'onn giubilar.

Martin Disler:

Ils conturns da la charezza

L'artist soloturnais Martin Disler (1949–1996) ha malegià il purtret d'ina lunghezza da 140 m e d'in'atezza da 4,40 m en il Württembergischer Kunstverein Stuttgart en in'acziun unica durant mo quatter notgs: mintga notg in purtret d'ina lunghezza da 35 meters! Quest maletg monumental è l'ovra la pli legendar da Disler. Svelt è l'ovra daventada enconuschenta e cun ella ses creader. Dapi ils onns 1980 è il maletg en in deposit. L'onn 2007 ha la fundaziun Gottfried Keller acquistà il maletg e mussà uschia che quest'ovra singulera è d'impurtanza naziunala. La preschentaziun en il Museum d'art dal Grischun – sco premiera svizra – vegn spetgada cun gronda tensiun.

Avertura dals 16 da favrer fin ils 26 da matg 2019

Flurin Bisig: A l'ur dal senn

Flurin Bisig (*1982) s'orientescha en sia ovra als constructivists, integrescha però er bleras influenzas da l'art dal temp modern e da l'architettura. En il Museum d'art mussa el objects da tola ondulada ch'el ha fatg aposta per l'exposiziun e ch'el oppona a sculpturas da lain e da

marmel. Ils divers materials premettan modas e manieras da lavurar ch'èn differentas ed uschia in auter tractament da la sculptura e dal spazi. Questa tensiun è il punct da partenza da l'exposiziun. Sper la lavur sculpturala ha Bisig sviluppà durant blers onns in cumplex d'ovras da lavurs da palpiri da color ch'el numna faudaziuns. Las serias che tiran endament dessegns e ch'èn per gronda part enromadas en in transferiment dal pensar sculptural en ina furma bidimensiunala.

Avertura dals 16 da mars fin ils 18 d'avust 2019

Transversal:

Cuntradas ord la collecziun

L'accent da la collecziun dal Museum d'art è mess sin l'art svizzer ch'ha in connex cun il chantun Grischun, dapi in pèr onns er sin l'art contemporan internaziunal ch'ha in connex cun il chantun mun-

tagnard. Da quai fa part la cuntrada da muntogna da medema maniera sco l'alternanza tranter emigraziun e turissem. Las muntognas èn lieus dal mitus, ma er da la conquista. Cur ch'ils Englais èn via giads tras l'Europa sin lur «grand tour» han els scuvert las Alps sco lieu spectacular per lur aventuras. L'identitad odierna dal territori alpin è caracterisada decisivamain da questa vista nà da dador. En la preschentaziun da la collecziun Transversal vegnan tematisads – ensemen cun ina selecziun d'emprest – divers aspects d'illustraziuns da cuntradas.

Avertura dals 16 da mars fin ils 24 da november 2019

**Ord la profunditad dal temp:
Art en il Grischun avant 1530**

La tgina dal Museum d'art sa chatta en la Villa Planta. L'onn 1919 è ella vegnida

transfurmada en in museum. Per il giubileum da 100 onns na drizza il museum d'art l'egliada betg sin ils ultims tschient onns, mabain sin bains culturals dal Grischun ch'èn vegnids stgaffids avant l'onn 1530 (avant la Refurmaziun). Uschia vegn dada ina dimensiun istorica a la lavur artistica en quest chantun. Per il project avain nus guadagnà l'architect *Peter Zumthor*. Mussads na vegnan betg mo objects originals, mabain maletgs contemporans dal fotograf *Florio Punter*. Cun ils egl dad oz guardain nus sin ina gronda tradiziun artistica.

Avertura dals 14 d'avrigl fin ils 15 da settember 2019

Passiun: Maletgs da chatscha

Schebain che la chatscha en il Grischun è quasi ina spezia da fatg social total n'ha il Museum d'art dal Grischun Cuira anc mai tractà explicitamain quest tema. Er sche l'exposiziun è enragischada localmain va ella lunsch sur il Grischun or. Ella sa chapescha sco reflexiun d'in tema ch'è s'exprimi artisticamain en ina moda spezialmain ritga e mussa ovras d'artistas e d'artists internaziunals dal temp medieval tardiv fin al temp dad oz. Ella tematisescha la surstructura mitologica dad Artemis e Diana fin al songt Hubertus. Ella fastizescha las parts cuminaivlas d'Eros e da Thanatos, mussa la chatscha sco tribuna da la pussanza, illustrescha l'impurtanza da trofeas, tschenta la dumonda da la cuntrada selvadia sco lieu dal desideri e dal giavisch da «vacanzas da l'esser uman» exequind in'activitad, en la quala «il misteri da la mort sa multiplitgescha cun il misteri da l'animal».

Avertura dals 22 da zercladur fin ils 27 d'october 2019

**Andriu Deplazes:
Premi d'art Manor**

Andriu Deplazes (*1993) fa maletgs figurativs en ieli sin taila da glin. L'uman e la natira èn ils unics motivs. Tecnicamain exequids en moda classica èn ils maletgs expressivs plains da colorits psichedelics. En questas cuntradas imaginaras n'han chaussas fatgas da l'uman nagina piazza. Ils corps dals umans sa mussan per quai en proporziuns singularmain bizarras, sco capslas, senza chavels e na possedan naginas cleras caracteristicas sexualas. La natira sco tala pictura Deplazes en moda refusanta sco deserts, sco cuntradas da pali u sco gauds selvadis che traguttan tut.

Il foss tranter l'uman e la natira sa spalanca e l'alienaziun che resulta siglia directamain a dies a la contempladra u al contemplader.

Avertura dals 14 da settember 2019 fin ils 12 da schaner 2020

**Exposiziun annuala da las artistas
e dals artists grischuns**

Per finir il program d'exposiziun 2019 preschenta il Museum d'art dal Grischun Cuira l'exposiziun annuala da las artistas e dals artists grischuns. L'exposiziun annuala permetta ina survista da l'operar actual da las artistas e dals artists grischuns contemporans. Sa participar a l'exposiziun pon artistas ed artists ch'han il dretg da burgais dal Grischun u ch'èn creschids si en il Grischun sco er tuttas e tuts ch'han dapi almain in onn in domicil fix en il Grischun.

Avertura dals 24 da november 2019 fin ils 12 da schaner 2020
Infurmaziuns pli detagliadas:
www.buendner-kunstmuseum.ch



Ils co-directurs dal Museum d'art dal Grischun *Stephan Kunz* e *Nicole Seeberger* han preschentà ier a las medias il vast program da giubileum.

FOTO Y. BÜRKLI